

PORSENÚ

## Le compliagn dl »Vinzentinum«

*L'istitut »Vinzentinum« da Porsenú complësc en chësc ann süi 150 agn de vita – y cun él ince le »Vinzentiner Knabenchor«, che é dal 2014 incá sot la direziun de Andrea Tasser de Badia. L'istitut da Porsenú é gönü metü sò dal vësco Vinzenz Gasser, da chël che al á spo ince ciafè l'inom*



Cun le »Vinzentinum« él ince so cor de jonins che complësc 150 agn. Chiló pro un de süi conzerc.

Foto: Vinzentinum



Le »Vinzentinum« da Porsenú: 150 agn de scora y de vita.

Foto: Vinzentinum

»Vinzentinum« é n inom conesciù ince tles valades ladines. Chësta scora cun istitut a Porsenú, é gönüda metüda sò l'ann 1872 dal vësco Vinzenz Gasser (1809 – 1879) – chël che á ince consacré dl 1876 la dlijia nöia da La Val. Le vësco Gasser à metü sò chësta scora cun la orienté da formé studënc y candidac, tla speranza che ai gniss proi. Impormó do la mort dl vësco á la scora ciafè l'inom de so fondadú. N gröm de jonins dles valades ladines é variá da ûsc dl Vinzentinum ite y á fat dailó les scores. La scora mesana pita incö döes direziuns: öna cun orar regolar y öna cun azënt sòn la musiga. Lapró él ince le ginase classich, che é le su tla pert a ost de nosta provinzia. Tles döes classes plü altes de chësta scora pó i scolars chirí fora danter na direziun de

sciënces naturales y öna de storia y cultura. Dl lungia le ginase y la scora mesana, él ince n internat davert por mitans y mituns. Le »Vinzentinum« n'é indere nia ma conesciù por süa formaziun. Al é conesciù ince por le teater che i maturanc porta sòn paladina ann por ann, mo dantadöt ince por sü dui cors – le »Vinzentiner Knabenchor« y le »Vinzentiner Mädchenchor«.

Compliagn ince por  
le »Knabenchor«

Rodunt porchël á la strotöra en chësc ann n iubileum dopl. Deache 150 agn complësc ince le »Knabenchor«, che é dal 2014 incá sot la direziun de Andrea Tasser de Badia. Tröc é stá i ladins che á ince bele denant albü funziuns te chësc cor.



Andrea Tasser é dal 2014 incá dirighënt  
dl »Vinzentiner Knabenchor«.

Pro i dirighënc unse p.ej. bele albü Rudi Chizzali da San Martin (dal 1990 al 2007), danter i presidënc dl Cor él sté danter l'ater André Comploi d'Al Plan (1997–2000) o Georg Plazza da Rina (2012–2014). Dal 2022 incá él Marcus Costalunga da San Martin. Pro i educadus dl Cor ciafunse Paul Felix Rigo da La Pli, sté dal 2015 al 2016.

Tasser: »Cianté é scora de vita«

Sce le Cor é tl pröm na atraziun por porté ite plü varieté tla vita dl internat, él incö dantadöt i iadi culturai y concertistics che tira alerch i jonins. Chisc fej pert de na comunità particolara unica te nosta provinzia (al é le su cor de jonins), che cumpëda al momënt 60 ciantarins. »Sce i mituns cianta danter éi, spo funzio-

nëiera avisa sciöche pro na scuadra de palé«, dij le dirighënt Andrea Tasser. Öna dles maius desfides por le cor n'é nia tan chéra da ciafè mëmbri nüs, mo le fat che i jonins rump la usc tres plü adora. Por fortuna n'él tröc che resta pro le cor ince dedô, insciö che al se moscëda dlungia les usc plü fines y altes ci mituns ince chères plü basses di jogn. Le cianté á tl Vinzentinum na tradiziun dér lungia y chësc cun buna rajun: »Cianté é na bona scora de vita, ajache an mëss s'ascuté sò l'un cun l'ater, mo dantadöt ince deache al scinca scemplamënter ligrëza«, dij Andrea Tasser cun convinziun. Por le iubileum dl cor, gnarál metü a jí trëi conzerc: danter chisc ince un a Badia, chësta domënia ai 26 de merz. Deplü ciafëise sot ales manifestaziuns.

PALO